

平
板
記

東萊毛荆石編

毛蕪林大令印贈


DS


793

S42Y466


1716

V.1





平叛記



平叛紀者紀孔叛平也孔叛始自吳橋繼而破登繼而圍萊凡歷十有八月而始敗之海外平叛所爲紀也然舍此無紀者乎曰有謝監紀有視師紀矣高監護有東征紀矣謝防撫有圍城紀矣卽吾郡部院張公亦有歸圍紀矣有則此何以作曰視師東征詳於叛兵之始末而萊城之危急不及圍城歸圍詳於萊城之危急而叛兵之始末不載是皆未得爲全書也辛卯冬余偶過子壻姜耿西館見其案頭有謝高諸公紀手攜以歸因作平叛紀圍萊以旌則本之視師

紀圍萊以後則本之圍城紀至復黃克登又仍本視
師紀以及保萊表忠諸書皆參而用之且閒取先正
之議論以附於其下斯不惟叛兵之始末以明萊城
之危急以著且使當季文武諸臣誰為墨守誰為血
戰誰為痛哭而乞師誰為選愬而縱寇為功為罪靡
不昭然於奕世下矣雖然是紀之作不過野老餘閒
纂述舊弄已耳而或且謂其大書特書也似史之綱
其條分縷析也似史之目可以資郡乘可以補明紀
則豈不佞所敢居哉

康熙重光單闕歲涂月上澣笑蓉島上逸民毛霽書

文章如面史才實難蹟湮則不暇書識庠則不能書
語涉忌諱則不敢直書而翻多譌書所以難也荆石
毛先生以績學緯材雄長海岱閒同時後輩挨手取
功名以去而先生猶老於諸生僅以文章流露聲光
所著平叛記老宿多稱之世或未盡見也先生以萊
人談萊事其所聞見皆不虛故自始圍以迄解圍之
日凡七閱月中閒叛者降者攻者守者援者撫者環
疏請師者捐軀殉節者力戰成功者莫不網舉目張
一倣紫陽書法埽除嫌忌示以信從可謂叙事簡而

用意精卓然以良史自命者矣長公九來來遊西江
校讐浹月付之開雕予讀之旣以服是書之詳瞻足
備將來史宸一則而又以歎明末任事諸臣庸庸憤
憤養癰誤國卽一隅可覘全局也噫三日而救至十
日而賊亡萊之不爲睢陽幸耳痛定思痛其亦有談
虎色變者乎康熙五十五年仲秋年家姪南州辜光
旦拜識

平叛記卷上

賀九師

貢九來

校字

東萊毛

霏荆石甫編

男

贊師陸

賡歌起

辛未崇禎四年

冬閏十一月二十八日登州援凌將士李應元等叛

於吳橋

吳橋縣名屬直隸河間府

毛荆石曰吳橋之變起謀者有應元之父九成矣
同事者有應元之帥有德矣以城應者有耿仲明
陳光福等人矣何為歸之應元春秋之書邾鄭伐
宋也獨先邾人誅其意也此之首應元亦原此例
耳

先是大司馬梁廷棟議築城凌河

在廣寧衛

以為

恢復遼計工甫畢凌城失陷報聞復命修築遣遼

帥祖大壽帥勁師護版築之役仍選精卒星夜前

赴以作聲援時部檄登萊巡撫孫元化

字火東嘉定人以乙

榜請纓授兵部主事陞寧前道受知梁大司馬時
方破格用人擢三乙榜爲巡撫元化因得開府登
萊標下勁兵泛海趨耀州鹽場

會兵覺華

島名在寧遠衛

託言風汎不利逗遛

不前又令從陸趨關赴寧遠聽調遣乃發遼卒千

人授遊擊孔有德千總李應元往有德故遼人

舊島

帥毛文龍

子也驕悍不法初無往意勉強前赴沿途觀

望至閏十一月二十七日次於吳橋時官兵屢過

地方多騷擾以故民皆閉門兵無食宿皆怨適部

卒與生員相爭有德答之衆遂譁然

時屯兵新城鄉紳王象春

莊白食鷄犬春子怒先投其父名帖復親講其兵不法狀有德將兵捆打貫耳兵遂將莊焚燬春子

潛逃次日千總李應元與其父九成縛有德於演武

場首倡反謀有德從之九成初為元化市馬馬價蕩盡至吳橋適與有德遇

遂與應元謀以為反亦死不回戈東指大肆搶掠反亦死不如一逞叛謀益波

所過無遺

二十九日賊破陵縣陵縣縣名屬山東濟南府

十二月初一日賊破臨邑臨邑縣名屬濟南府

初三日賊破商河商河縣名屬濟南府

初四日賊破齊東齊東縣名屬濟南府

賊所破諸縣皆劫庫縱囚。時巡撫余大成字集生

駐劄省城巡按王道純字懷鞠陝西蒲城人天啓乙丑進士巡歷平

原去賊甚近道純初聞變卽移書大成發兵勦捕

大成不信復書云一塊土之兵不宜作鄒魯之閔

道純再趣之遂託病請告

初五日賊圍德平德平縣名屬濟南府

旣而舍去

初六日賊破青城青城縣名屬濟南府

巡撫余大成發兵勦賊

余撫以賊勢猖獗發濟南兵命中軍沈廷瑜率之
發武德兵命參將陶廷鑑率之

初七日賊破新城知縣秦三輔訓導王協中在籍同

知王象復舉人王與夔張儼然死之

新城縣名屬濟南府三輔陝西

三原縣舉人

新城故多巨族有德至三輔等禦之俱死賊遂入

城吳橋之變象春之子激之故焚殺尤慘

毛荆石曰當時舉貢殉難者皆格於例不得旌至是少宗伯陳子壯以為請乃贈與夔儼然俱宛平知縣其陷他縣死節貢生張聯白將時行俱贈順天府學教授

初八日陶廷鑑等兵敗於阮城

時承平日久武備廢弛將士驕怯畧無鬪志廷瑜臨陣尚乘肩輿至阮城店與賊遇濟兵先退賊遂乘之大敗德兵殺傷爲多廷鑑等俱遁還

詔巡撫余大成孫元化進兵會剿

事聞命兩撫速行捕剿

防撫孫元化移檄招安

是時賊見我兵將合且搶掠得志遂整兵而東不復攻城元化聞報初亦不信謂必別處逃兵藉口

於登兵也既知有德果叛乃移檄招安兼檄郡縣
不許截殺賊遂得安意長驅無敢一矢加遺者
十二日巡撫余大成移鎮追賊防撫孫元化亦帥師
道之尋俱引還

大成差官乙邦才

字奇山
青州人

招安賊捆打四十放回

元化屢遣人入賊營諭令歸命賊佯應之元化因
遺大成書曰撫局已就我兵不得往東一步以致
壞事大成如其戒而止元化亦師次黃山館而返
謝象三曰當是之時識者謂兩撫前後夾
擊則賊可盡殲而惜乎其以招安自愚也

毛荊石曰余大成不足責矣至孫元化固請纓者也以一榜驟膺開府思宗任之不為不隆矣乃部下一叛將至破數城而猶不信及知其果叛矣徒欲以招安結局致陷兩郡生靈塗炭請纓繫南越者固如是乎厥後西市之伏法不足以蔽其辜矣

附考 邦才後至總兵官為史可法部將以戰死

十三日萊州府知府朱萬年示城守約

朱字鶴南貴州黎平舉人

一議 凡官吏師生人等有願入城守者聽在

城婦女一不許出城違者重治 一凡縉紳百

姓有糧草在外者許速搬運入城以備自用凡城內一粒一草不許移出以資敵人 一十字路口

卽立柵欄一座責令附近居民輪流看守至定更
後卽行封鎖非奉令箭不許擅開五更後聽礮啓
鎖失悞者重治 一有疾病生產緊急事情許執
燈往來以便認識訊問的實方許放行仍不許夜
聚飲賭以生事端違者以軍法從事 一十家爲
一牌鄉地挨戶清查如一戶男婦共幾名口某人
年若干歲某處人係何生理或男若干歲何生理
或弟若干歲何生理不許隱漏一人遇有外來寄
居已久者一例入冊新來者取具保結方容在內

若無保結卽令移居出城以杜不虞牌內有素行
不端踪跡詭異者卽公同舉首如有容隱事發十
家連坐 一每牌備麻搭五把火鈎五杆以防火
災仍於各家門首設水缸一箇若遇有火止許本
牌十家互相撲滅不許別牌來援以防姦宄竊取
財物其左右兩牌人等各持猛棍站立門首若有
忙亂招呼鼓衆者以姦細論 一牌冊已定卽查
冊內每戶取壯丁一名編派城頭以充垛夫 一
萊城周圍三里十八步城垛共一千七百七十八

箇竝大樓角樓馬面量安紅氍大礮一尊用四輪
車駕之以便轉移那動且防退崩傷人之患 一
守垛之夫各置猛棍一根高出人頭粗如鷺卵每
十觔爲度務以堅實之木爲之 一每垛置箭簾
一挂既可避矢亦可蔽敵人眼目我更可以陰施
礮矢 一每隔一垛用執石壘之高厚皆與垛齊
上堆雷石以禦敵人 一五垛置一小燈十垛置
一大燈用長杆引索挑出城外燈下以石墜之燈
上另有燈蓋以免搖動湮滅之患或用鐵籠卽然

乾柴以省油燭更便也 一每垛派守門夫五人
至夜每人守一更爲度令箭不時巡查晝則止用
一人其四人下城各作生理有警鳴鐘務必各守
其地違者以軍法從事 一城垛夫竝守柵欄人
夫俱備梆鈴有警不許喧譁違者以姦細論 一
敵人攻城多用雲梯以矢石禦之多不得近至城
下或已豎起卽用鈎鈎住提上城頭或用撞杆撞
之可應手而碎或鈎住梯左叉住梯右順城一推
無不斜倒零碎者 一築營防汛三山女姑海口

者俱撤回派守城頭萊膠靈鰲雄五衛所春班邊
軍俱題畱在城一同護守 一大樓角樓下各屯
軍五百晝則升旗夜則挂燈有警以此為號一處
有事只令左右屯兵救援其他不許亂動以防指
東擊西之虞 一城守人衆錢糧易盡倉穀支發
勢必不足擇日齊集城隍廟各出義助銀兩數目
登記各人名下銀數少竝粟少者公議另加 一
城守人衆公議餉兵其稍有力者兩家輪流不得
慳吝推諉以取罪戾 一四門四角重地專任有

司武職協同以在城鄉紳謀畫指揮悉聽約束
一敵在近郊貧民勢必乏食擇日約衆鄉紳竝富
民公議某家糶若干石竝議定價值不使措勒致
使不堪 一賣官柴查官房棚廠倒塌無用者悉
令拆毀劈柴出賣每觔定價銀二分 一四大樓
前各壘牆一堵以護樓門樓中坐臥可恃無恐
一城下四門外各壘大牆以護城門周圍亦壘矮
牆以護避難諸人 一南北二門各置千觔鐵葉
牖一具上用大繩引繫滑車以便啓閉提掇

十八日賊抵萊州

前十一月賊赴援過萊時朱守知其必叛以牛酒厚享於郊賊甚德之至是賊回遣人向朱守曰朱上臺勿恐前厚享之恩終不敢忘也秋毫無犯而去

二十二日賊抵登州

賊至登駐兵城南密神山孫元化命標將張燾率遼兵駐城外總兵張可大亦發南兵拒戰時猶再四遣人招安賊不聽夜攻城西礮擊卻之

附記 先是登州有一道人呼於市曰張竈王一箇餒瓜兒也不得喫人與之錢不受與之食亦不食至是遂不見

壬申五年

春正月初二日我師及賊戰于城東敗績

我師與賊戰南兵方勝張燾所率遼兵遽引退南兵遂敗殺傷殆盡燾部兵半降賊

初三日賊破登州總兵張可大鄉紳張瑤死之

燾兵降賊者復詐來歸城內士民咸言不可當事許之於是賊俱混入中軍耿仲明都司陳光福等

密謀內應是夜舉火有德等遂從東門殺入城陷
元化方在城頭引刀自刎不死為賊擁去登州道
宋光蘭監軍道王徵暨府縣官皆為賊擄惟總兵
張可大自縊於水城鄉紳張瑤罵賊遇害妻子皆
赴井死是時尚有舊兵六千人援兵千人馬三千
匹餉銀十萬紅氍大礮二十餘位西洋礮三百位
其餘火噐甲仗不可勝數皆為賊有居民男女數
十萬殺劫淫污備極慘酷

謝象三曰按登州僻在海隅阻山負海素號荒阻
自遼土淪亡遼人渡海散處于各島及諸州縣島

帥毛文龍收拾遼衆自爲一軍東江之師以登州
爲孔道歲餉八十萬皆從登海往於是熙穰成聚
往年建恢復四衛之策者欲從登海渡師始設巡
撫練兵治器殆無虛日天下之談兵說劍者競託
足焉遼地旣淪一切縻帑布帛之利由島上轉輸
商旅雲集登之繁富遂甲六郡然遼人在地方頗
不相安識者久已憂之自孫元化爲巡撫元化旣
在遼久每言遼人可用于是多以遼人補伍朝夕
訓練養成精銳文龍死後島中繼有陳繼盛劉五
之變部下義子耿仲明李九成孔有德等逃散四
方旣而聚登黃緣爲將此輩素獷悍貪婪不知法
度視登州爲金穴欲得而甘心焉非一朝一夕三
人中耿仲明尤多權智李九成敢勇善戰六城之
破九成衝鋒登州之陷仲明內應二賊尤罪魁也
趙黃門吉士張壯節公傳曰張可大字觀甫其先
孝感人世襲南京羽林左衛指揮登萬厯二十九
年武進士歷浙江都司調守儀真貢船被劫於杭
山計擒其魁陞陽電參將征黎用黑番爲鄉導入

其洞平之調舟山修城禦倭築堰灌田兵民咸德之晉南錦衣可大諳練韜鈴兼善詩古文公餘雅歌投壺一觴一詠恂恂如儒者任陪京著錦衣志等書人稱雅贍陞山東總兵官時崇禎元年也會三方佈置之議起登萊為神京門戶主客兵雜處新舊餉兼支繁瑣無緒可大至定經制汰冗冒外地立水營為汛守內地立陸營為城守備禦嚴而歲省浮餉二十餘萬自遼土淪喪議者謂恢復必先四衛而復四衛必先旅順或議隘南關嶺或議築長城島可大以鹽塲口居兩山開其隘可守外距木羊城二十餘里內距旅順關十餘里首尾易顧更設鏡城於黃金山最高頂而金州鞏於磐石矣遂浚計城之城成議者乃服高麗貢道舊由山海關遼陽失後改由登萊可大以麗船往來內地茲究易生請從覺華島登陸乃由關門入皆未雨之籌也妖賊作亂衆至萬餘圍萊可大破走之二年冬京城戒嚴奉詔勤王三年還鎮至四年而登兵有吳橋之變先是毛帥文龍鎮皮島遼人孔有

德等歸隸麾下文龍待之甚優有德等亦樂爲文
龍用文龍處海外凡有奏報或恢張失實事亦有
之然於國家形勢則屹然重鎮也及袁崇煥出督
關門疑文龍跋扈難制殺文龍他將代者於有德
等亦僅以老兵置之有德等既失所依皆落魄無
聊又心憐文龍無罪橫受屠酷怏怏每思投隙
而起未得其會也四年大凌河告急登撫孫元化
建議欲復遼土宜用遼人欲固遼心宜用遼將於
是令有德等率兵千餘人赴援十二月行至吳橋
天大雨雪以市民間食物罄乏遂劫庫殺官而有
德等家口皆在登城乃倒戈而回破所過州縣盡
肆焚劫新城受禍尤慘可大聞變亟率兵往至朱
橋驛值元化言撫局已定阻可大毋西行及登城
被圍可大議速徵各郡兵會勦而元化仍主撫議
不聽欲乘其初集勒兵出戰又苦禁之分可大汎
專守水關而令遊擊張燾禦之未及交綏燾兵反
與有德等合脫回三十四人求入塔門納之次早
有德等攻城昨所入三十四人攘臂大呼全城應

焉五年正月城陷可大分守水城知勢不可為解
所佩大將虎符授旗鼓吳振姬開道歸山東上之
殺其妾陳氏遂自縊於署內之太平樓
後蒙優卹而登撫等竟泛海歸天津

趙吉士行取推官張公傳曰張瑤字蓬萊人

天啓五年進士授開封推官為治嚴明絕請寄抑

豪強民敬之若神政聲冠全省撫按交薦崇禎四

年與萊陽宋汝行取入都時沂州宋鳴梧為吏

掌科舊制臺省雖七品官得風聞言事閣部大臣

一受糾抨多不安而去人咸畏之御史猶轄於總

憲惟六科無所統屬均稱內府體更尊吏掌科操

百官賢否黜陟於六科中尤高自簡貴若外吏趨

謁必勞門者錢乃得通姓名瑤往無所予門者有

煩言瑤素剛直不能忍詈之鳴梧以為褻其體也

不悅援汝為給事中而抑瑤僅授府同知瑤大怒

撻汝行賄狀列疏上聞冢宰惡其侵已也亦劾瑤

餽遺奔競鳴梧復極論之遂謫河州判官未赴旋

五年正月叛兵逼登州瑤率家衆登陴拒守城

陷璠猶揮石奮擊賊擁至被執大罵不屈
見殺妻女四人並投井死贈光祿寺少卿

上命逮治孫元化張燾等官

登州既陷東省大震報至上命逮治元化張燾及
道府等官

命總兵楊御蕃王洪劉國柱統兵會剿

楊字翰城沂州人楊肇基

子年少勇而多機畧王榆林人王威之子體肥胖恒怯之狀一見而知

時梁廷棟已罷熊明遇

字良孺江西進賢人萬曆辛丑進士為本兵

於是調通州兵以副總兵楊御蕃統之凡山東之
師皆屬焉加總攝銜調天津兵以總兵王洪統之

調保定兵以總兵劉國柱統之各刻期赴勦

李九成孔有德自稱爲都元帥

賊部署營伍僞授官爵鑄都元帥印自稱替天行道都元帥推李九成爲首有德次之耿仲明自稱都督括民間金帛子女用巡撫關防檄取州縣餉銀齎萬金犒島誘令同反

初五日巡撫余大成領援兵如萊

大成聞登州已失入萊爲守禦計然束手無策唯閉戶誦經而已分遣萊營官兵以副將張奇功率

五百人守黃縣以水寨營守三山以左右營守平度卽墨主兵調發客兵驛騷

初六日原任吏部考功司郎中張忻至自京師

忻字靜之

號北海天啓

乙丑進士

張以左遷浙江藩幕便道歸省甫入門朱太守馳往謁之告以余撫軍提兵在府已經旬日殊無東意而參將余五化者日與賊通且濟南鋒營兵日索犒無餉恐內變幸公一言張卽謁余力言先逐余五化以清姦細請徐肩宇

名從治浙江海鹽人時爲武德道以

監軍留班軍以守城余皆嘉納行之而余五化則

尚未逐也

余與有德為八拜妻子在登有德俱養待如禮

客兵謀為亂

客兵訛言欲為內應以夜舉流星為號幸臨清營泄其機朱太守多方誠諭捐貲厚賞仍勸鄉紳犒之一面逐戶清查謹巷柵多設兵丁夜巡三令五申居民出戶者死王及兩見流星逼天而城中闐然無一譁者

初七日釀兵餉

萊郡紳衿齊集城隍廟公議醵銀以充守城軍丁
工食

毛荆石曰張黃門孔教及子考功忻共捐銀一
千兩時先君為諸生亦捐銀二百兩餘未詳

斥逃城士庶

是日南門內欲逃城者蝟集或貴易賤服或女扮
男妝朱太守以法斥之者三眾乃驚散

毀關廟祠廟

朱太守命毀西關大士海神二閣以防攻城撤南
關關帝祠以防伏姦

十二日賊遣人送孫元化梁丹崖書於余大成

是時登州文武各官及鄉紳賊皆幽繫一室聽其
指使為具揭遺書大成欲令具疏招安其大意欲
朝廷畀以登州茲所屬八縣然後投順年年納賦
立功報効當時無論識與不識咸髮指恨其出語
狂諄而賊之心腹參將余五化在大成所力言可
撫大成得書揭為聞於朝惟巡按王道純抗言不
可公論韙之

十三日賊破黃縣知縣吳世揚縣丞張國輔參將張

奇功守備熊奮渭死之

黃縣屬登州府世揚河南洛陽縣舉人

奇功為萊州參將時將離任慷慨力請守黃以障
萊余撫僅與老弱兵三百賊自十一日攻黃張死
守不能下至十三日賊自南城入兵民多潰張猶
奮臂大呼持刀斫殺賊十二三人賊遂擁上力竭
遂為賊執肢解之

趙士喆曰張參將真定人也魁梧善戰叛賊過萊
請察夜擊之眾不可余撫使帥兵三百守黃請濟
師弗許賊至城陷公
手刃猶殺十人哀哉
豺狼獸飽自西來請擊如公亦壯哉東手養癰緣
底事英雄至死有餘哀

附考 士喆字伯濬掖人甲申避兵松椒山遂不
歸與弟子董樵耦耕海上著石室談詩建文年譜
遼宮詞各若干卷

官紳分汛守城

破黃報至萊郡官紳公議上城協守知府朱萬年

守南門同知寇化

山西榆次人萬曆乙卯舉人

守東門通判任

棟

陝西人

守北門掖縣知縣洪恩照

河南息縣人進士

守西

門鄉紳則考功張忻御史姜兆張

字省宇進士

錢

號若海

守東北角副憲賈毓祥

號四塞進士

御史

趙胤昌

號芝庭進士

守西南角御史毛九華

號六息進士

太

守徐廷松

號恒山舉人

守東南角副使畢拱辰

字天目進士

光祿姜啓哲

字鏡明廕生

守西北角

張北海曰初派如此未數日有至有不至者矣

再禁逃城

朱太守出示曰其此城卽其此城安危無論權豪貴要敢有先去以爲民望者本府決不與之俱生

示後闔郡凜然

附記黃縣范相公丁艱在籍聞登失守攜家移居萊城旣見黃陷復欲出城西去因討取撫軍令箭提棧出南門尚未成行朱公急赴院講云縉紳民所仰視不可令去以爲民望當事以爲范宦客

居不可以鄉紳論朱公脫冠擲地曰老大人只管
得卑職官箴難管卑職封疆今日之事卑職一身
任之請老大人勿為越位之謀言畢率生員二十
人各持猛棍諭曰敢有出此門者打死無論午後
范宦率三十人擁男女轎二乘至門下諸
生舉手碎轎男女流血滿面扶掖而去
又北海張公聞登陷亦欲攜家就任朱公特出一
示云連日東信緊急百姓各欲逃遁張宦聞信連
夜至萊共守封疆論身家性命張宦與爾等自有
輕重乃捨身倡義以全城池本府不勝仰重自此
張公不復
思出矣

十五日內府翟昇以右軍至

昇至見一切防禦喜謂朱守曰都人咸稱公之才
以今觀之殆不虛也

革巡撫余大成職尋逮治

是時言官交章論大成畏縮失機有旨革職聽勘未幾逮治

十七日以徐從治為山東巡撫謝璉為登萊巡撫

謝字

韶石湖
廣人

原任巡撫謝璉時在刑部獄廷臣多言其才畧可用上命出之擢登萊巡撫星馳受事

二十一日武德監軍道徐從治至

徐公素諳兵機朱守喜曰得此人吾萊生矣聞城

兵民俱驩

遂余五化於兗州

時五化未去張考功謁徐公言余五化尚在肘腋
恐有內變徐卽力言於余撫立發一牌押五化往
兗州趣兵實收其兵丁馬匹也

二十二日總鎮楊御蕃王洪各將兵至

萊州道宋獻以齋捧還

宋潭陽人進士

尋以憂去

知府朱萬年署道事

二十五日總鎮楊御蕃王洪帥師東征

鄉民饋食者幾二千挑兵士驩呼

二十八日我師次於新城

新城鎮名距旅縣八十里

二十九日戰於新城我師敗績

賊率衆來迎津兵先潰王洪遁回御蕃被圍乃變

半直突賊營而出楊師得全

張北海曰王楊各列兩營王洪領津兵立於一山頭上入暮陣未列而王營先潰王洪騎奔馬先逃賊始攻楊營攻打一日一夜不能破時賊已還茲細於朱橋各道燒斲糧草楊兵一日一夜未得食始還

三十日登萊巡撫謝璉至

隨行官丁止二十餘人

公自記曰余以月之二十一日午刻出都門計程
千七百里介馬而馳費日有九畏此簡書恨無羽
翰甫下車與撫院徐有宇相晤自陪京一別經十
六年言念疇昔光景依俦乍見翻疑夢相悲各問
年誠善
咏也

附記 公并客時轎
扛損折幾委於地

二月初一日巡撫徐從治謝璉俱於萊州莅任

內府徐得時以左軍至

徐字
振宇

兵潰報至

張考功等正在徐撫座王洪遣人持令箭來報王
楊全軍覆沒眾俱失色徐撫曰縱敗不至此及午
楊使至始知王先敗逃楊尚堅壘

巡撫謝璉命都司鮑守正製火器

已後謝於東察院到任畢卽料理守城事長隨有
都司鮑守正善火器卽命入局製萬人敵轟天雷
火箭火毬等項陸續運至城頭

初二日總兵楊御蕃入城協守

王楊二總戎先後回駐劄城外兩撫出城細詢兵

潰之由王僅餘三百騎楊猶獲全師而返時各兵
前無見糧後有追寇相率西奔因議遣王洪退鎮
濰縣畱楊鎮下家丁三百人資為捍禦一臂士民
疑畏堅不肯內謝撫諭之曰無兵無將城誰為守
脫不靖當為爾輩任之眾始帖然

錢贊伯曰按歸國記初三日辰時賊已將至楊鎮
尚擁三百騎於南門外徐謝從呼入而朱郡伯與
諸生猶豫不決趙芝庭與余以百口保之
始啓牖延楊入張以為初三日事與謝異

檄副將吳安邦沿途收諸兵所遺器械

恐以資敵也得挨牌三車銅大將軍一位

檄掖縣挑選各社精銳鄉兵赴城列守

檄萊屬圍練鄉兵以備不虞

初三日賊至萊州

卯時前撥秦大鵬等報賊前鋒五百騎已至平里

店

距城三十里

登陴望之已後見賊從東北嚮西南勢

甚飄忽一營於城東碑兒坡

距城五里

一營於城西福

祿山

距城五里

四面繞城聯絡下營十四五處而遊騎

則星掣電馳或舞刀以示威或闖關以搜伏抵暮
列炬四周光燄徹天然未攻城也

附記 是日朱太守差冷書辦探賊營孔有德曰
看朱太爺面並不攻城只在城外喂馬便上南京
撫鎮等官分汛守城

徐撫院楊總戎駐西門謝防院徐內府駐東門翟
內府駐北門

逮撫孫元化等下詔獄

賊用仲明謀放孫元化宋光蘭等還泛海至天津
津撫奏聞俱逮下獄

初四日賊攻城

寅時賊移一營於演武場毆所擄難民於前而繼

以精銳駕雲梯執挨牌攻東北角甚厲伐樹填濠
蟻附逼城薄暮轉攻北門及東南角喊殺遙擁勢
若平吞賴楊鎮內丁善火器分派迭擊而列守員
役亦無不致死力者殲賊無筭委屍於濠達曙方
退

初五日賊攻城

賊攻東北正北西北正東正西凡五處礮矢如雨
城頭分禦之傷賊甚眾薄暮專攻西面我兵仍擊
卻之此兩日初交賊鋒人頗有懼色賴謝撫法嚴

故人皆用命無敢譁怯

初六日總人焚賊攻城具

賊未列營潛逸四關恣行焚掠乃總人火其近濠
所遺雲梯挨牌門扇竝獲其器械無筭

下按院監視塘報

漏下二鼓謝撫遣標下聽用官曲咏武等偷賊營
詣青州下按院竝監視塘報

初七日揭守城款於樓頭

大書守城六款揭之樓頭

招遠等處募義勇復登州

兩撫密遣標下家丁謝一豸等持檄分行招遠萊

陽福山棲霞文登

五縣俱屬登州

每處給空劄三張令其

招募義勇為恢復登州之計更遣一諭帖為守登
城繆為款語蓋聊以疑之不問其應否也

遣人齎奏

遣聽用百戶孫啓元班軍張典往京齎奏報到任
竝請旗牌報賊情竝請兵馬疏一通

臣原任山東布政使司左布政使崇禎五年正月

二十九日准吏部咨為缺官事該本部等衙門題
奉聖旨是徐從治陞都察院右副都御史巡撫山
東等處地方督理營田提督軍務寫敕與他欽此
欽遵備咨到臣臣卽望闕叩頭謝恩訖隨於本日
准原任巡撫山東右副都御史余大成咨送原欽
奉嚴處預備倉糧查閱民兵督發班軍督催薊鎮
宣大糧餉督催漕糧傳敕五道達字三百八十九
號符驗一道令旗令牌八面副萬字三千二百七
十二號巡撫山東銅關防一顆竝吏卷等項各交

代與臣接管行事外伏念臣自崇禎二年五月閒
蒙聖恩俯允順天撫按為臣代題休致自安於一
丘一壑之內矣詎期聖明采及葑菲起臣田閒臣
聞命促裝於崇禎四年十二月二十三日赴任自
登城失守全省震驚舊撫臣余大成題臣監軍因
於五年正月十二日檄臣過往遂於念一日馳至
萊州府而黃縣又先失矣與撫臣余大成鎮臣楊
御蕃王洪擇二十五日進兵伏蒙聖恩垂念時事
孔棘命臣巡撫重任臣自惟碌碌庸才卽時平猶

難致理况軍務旁午之日乎拜命飲水於二月初
一日與登萊撫臣謝璉同日到任政在商確調兵
勦賊之計而初三日賊已奄至城下四面圍繞不
能齎奏候至初六日始遣人縋城而下僅移塘報
二封於監視臣呂直按臣王道純求其轉聞未卜
能達否初七日颶風竟日賊氛或少歛欲遣官齎
奏日來情形危迫之狀盡在塘報中不敢多贅但
望援不至臣雖同防臣謝璉總兵楊御蕃監視太
監徐得時翟昇誓眾死守恐難久持伏乞聖明白

為社稷計急救兵部調馬兵六七千星馳前來或
可保全萊州一塊土也臣與監視臣呂直及防臣
謝璉按臣王道純議勦長策滅此而後朝食定不
以賊貽君父憂也為此今將到任日期竝收掌過
符驗旗牌關防緣繇理合具本專差官郭尚文齎
捧謹具奏聞

崇禎五年二月初一日申時據署總兵官楊御蕃
塘報內稱正月三十日午時有馬賊七千餘人自
未時與鎮營衝打御蕃親督兵丁去營濠邊與賊

對射至酉時賊畱二千餘眾在營東安營其餘復
攻圍西南山天津營至一更時各相對列營至初
一日辰時賊兵四圍津營又到步賊萬餘架紅巨
大礮竝大將軍等礮重疊圍攻各營只望見津營
差將官陳奇功與賊講撫兩邊差人往來不絕賊
忽將津營衝開王總兵似領馬兵衝出不知向往
賊眾遂踞津營本營與鋒營萬分危急且輜重不
接乞速發援兵以救危急倘誤時刻不可言矣理
合塘報初二日辰時又據楊御蕃塘報內稱初二

日卯時賊拔營齊來用紅巨大礮五位大將軍三百餘位攻圍鎮營二日夜時無暇刻本鎮親督兵丁與賊對射用礮打死賊兵數百賊眾攻圍愈急二日夜官兵俱無食用大礮三十餘位耗破二十四位火藥鉛子俱無各兵至酉時奮力撲殺一處賊兵漸退南山步兵不能遠追各丁割級一百二十九顆搶招旗十四杆隨收兵暫回萊府俟援兵盡集一奮勦滅有功員役並礮傷官兵馬匹查明另報等因到臣該臣謹會同監視登臬太監呂直

巡撫登萊都察院右僉都御史謝璉巡按山東監察御史王道純看得天津總兵王洪初時見其軀臃腫而氣蕭索動稱賊勢眾大有談虎色變之意及至新城扎營與各營相距甚遙彼此難以救援幸彝丁驍勇力護本將潰圍而出賊且踞其營取其火器以打我兵孰非王洪階之厲也如無後效難追前愆津營先潰各營動搖幸楊御蕃傳令鎮定自辰至酉與賊攻打數陣殺賊無算火藥鉛子俱盡糧草阻隔夜劫賊營全師而還功有足多焉

若楊御蕃者慷慨激烈誓不與賊俱生鼓舞奮揚
能使各兵用命膽畧俱備綽有父風所當急爲獎
勵以奏膚功者也但賊實有馬騎五千步卒萬餘
而我之馬騎不足一千步卒不足四千眾寡不敵
卽萊城危於縈卵蕩平其何日乎伏乞敕下兵部
急調驍勇馬兵萬餘星馳前來協勦便可刻期奏
效矣緣係緊急軍情事理未敢擅便爲此具本專
官李敦厚齎捧謹題

賊四出搶掠

百里之內房屋盡為燒燬男婦皆為殺掠矣

賊殺處士王琮

趙士喆曰琮貧而好古性迂拙自號木石居城北之諸流邨賊至不避為所執不屈死之道義交遊二十年追思直諒忽潛然時流已自知君少况復羣兇鮮愛賢

郭揚率鄉兵禦賊死之

趙士喆曰揚長幹多力率鄉兵禦賊斃其一眾寡不敵竟為賊害揚寒陋寡交後竟莫為請卹者從來文弱是書生殺賊如君死亦榮眼底青衫爭冒賞何人知有郭揚名

初八日賊發騎西行

賊發騎數百西向似有探我援兵之意

附記 謝撫與徐撫方對坐西城樓上相距纔二尺許賊暗發一矢勃率從中經過著座右圍屏上相顧駭愕

初九日賊四面攻城我兵禦卻之傷一賊頭目

辰時賊毆集難民擁雲梯轆車各數十乘四面環攻卽西城一面三處受敵我兵用礮箭木石極力射打傷賊甚眾內傷蟒衣頭目一名賊號泣擡去有難民來歸

謝以難民為賊迫脅傳令乘便逃走一闕而散者百一十人俱赴南門下背牆而立城上投以飲食

初十日賊掘隧道縋都司王泰初百戶白仲仁率難民擒賊獲徐夢麟以歸

黎明賊列隊伍掌號放銃狀若赴敵乃暗於東北角掘兩隧道謝撫命標下都司王泰初萊州衛百戶白仲仁三鼓縋城率城南難民密殺掘洞之賊經東弔橋被一賊驚呼不果遂執此賊以入細鞠供稱姓徐名夢麟掖人投孔有德下王從友充爲前探舉心腹寄之矣前日曾伺官兵消息暗入萊州且云賊細作甚夥萊道旗鼓吳恭謙登州水營

余五化其魁也初賊視萊猶登謂取之當如摧拉
不意屢攻屢挫且妄意圍一月將不攻自破又言
列位老爺不要望大兵孔總爺已用金珠蔭貂託
孫防院進京買閣部主撫就剋了萊州也只是撫
云云審訖卽梟以殉

賊分兵攻平度

平度州名屬萊州府距府百里

賊發標旗十二杆兵六百攻取平度

十一日賊築礮臺於西弔橋外

賊於西弔橋外先豎門扇遮蔽內用土木閒疊層

壘一臺高與城埒上置西洋大礮對城攻打準如射的

賊穴東北角城

賊又於東北角穴城而入者五六處撫院命萊州衛幕王化等於城內對穴掘濠深一丈闊三尺懸大甕銅鐵響器於內令人靜聽以察遠近

十二日賊攻東北角城

辰時賊於東北角架紅氍大礮三面環攻鐵子大如升小如拳重七八斤不等有重十餘斤者擊角

樓堞口竝守堞以應聲礮粉遂取所造木堞障之
用水溼綿被遮其上我兵雖不無損傷而捍禦益
力至酉賊乃引去

錢贊伯曰歸圍記架礮環
攻乃十三日事與謝記異

賊運登州紅氍礮至

賊駕牛車運紅氍大礮七八位入營每位用牛四
頭皆重二三千觔

十三日下按院塘報

賊陷平度知州陳所問州同盧弘亂吏田房增偉亂

之陳字審之文安人萬曆乙酉舉人後贈太僕寺少卿予祭葬

先是有德等遣人招島眾同反旅順將陳有時據臂而起殺周衛二將率旅眾七八千人渡海從賊賊勢益張於初十日攻平度至是城陷州守自縊無何賊引去我兵復入據之

十四日焚賊西門礮臺

賊於西門所築臺上將樹枝門片紛紛投下意欲填濠飛渡徐撫軍懸元寶三錠募壯士共二十五人奮勇持火罐燬之臺與守賊立刻煨盡竝燒死

一頭目賊

十五日賊復築礮臺於西門外

登州庫藏暨子女玉帛已盡入有德等手有時兵
無所得每言空反一場諸賊約攻破萊州所得盡
與有時時故亡賴敢戰兼垂涎所入益竝力死攻
因前臺被焚復退築一臺左右各作臺翼之時而
為三移礮於上

東北角掘隧及城

賊復築臺於東北面而所掘地道五處則皆已穿

至城根懸飛石捶之不能中人心憂惶

芙蓉島有船

午刻城北樓上望見芙蓉島船可三十艘疑是賊
所設疑兵島兵有識者謂是神武左營參軍彭有
謨領川兵從海上來援也遂於是夜差家丁孫高

捷往探之

彭湖廣
麻城人

東城縋人焚賊洞

謝撫於東城以象人愚賊賊初驚射後顧之而笑

因募人下城剡洞迤東西洞漸次焚塌

賊所掘洞
皆以門扇

仰承下用大柱頂之但圖人許火藥柴薪相繼
遞投延及承頂之木自相燭熾直達洞口而止
唯東北角一洞賊環礮力護掬運如故

四川道御史王萬象疏報軍情

王字新寰天
啓乙丑進士

奏為二東告變緊急軍情事據東撫徐從治塘報
萊紳賈毓祥公書言遼賊自吳橋發難回步至登
連破數縣屠戮官民搶奪財物似此逆天之狀撫
按諸臣各有本章上達宸覽無容臣贅也臣所特
陳者我皇上有軫念民社之仁而武臣無報國盡
忠之義正月二十五日天津總兵王洪統領津營

軍兵通州副總兵楊御蕃統領沂營鋒營青營軍
兵同至新城鎮與賊相距賊悉眾而來圍繞我營
而王洪先懷畏憚遣人往來與賊講撫賊窺其勢
怯猛力急攻而王營被賊衝破王洪不與之敵畏
避而逃賊遂踞王營偕其所遺火礮器械等物復
攻楊營甚急幸楊御蕃百計周方與賊相持使賊
無隙可乘經兩日夜粒米未曾入口軍兵難於持
久遂夜劫賊營全師入萊以與文武軍民共守萊
城焉由此觀之逆賊之猖狂我兵之搖動皆王洪

一人之罪也設使王洪不先懷畏憚念朝廷養之恩與楊御蕃同心協力誓不與賊俱生安知我兵之不勝也若我兵一勝則賊勢必歸登斂跡而不敢前矣又何得於二月初旬乘勢圍萊四面環攻驅難民執挨牌架雲梯伐木填濠窰洞掏穴以致我萊城以斗大之區危如累卵文武軍民日日寘水火之中而莫之或寧也哉臣思普天之下莫非王土率土之濱莫非王臣一民不被其澤猶且廑聖明之念而况萊城所繫非小為山左命脈之

關東鎖登州之咽喉西樹青州之屏障且青州之
西卽濟南濟南之西卽德州由德州南北以及淮
安通州皆漕運緊要之地萬一萊城不測賊必順
流而下一往無前震動神京內外艱食矣天下大
勢尚忍言乎哉叩祈我皇上軫念祖宗二百餘年
之樂土垂憐登萊數千萬戶之生靈急救主客軍
兵星夜進剿趁賊勢未熾可一鼓而就擒也

十六日巡按王道純塘報至

內稱援兵已陸續發行只須吾輩耐持數日耳因

知平度已陷州守死焉

賊送贊畫張國臣諭帖及旨意來閱叱卻之

張字寧宇遼東

人

時勦撫之議紛云不一當事主先入言力持撫議
以為必可就緒於是遣兵部主事張國臣來講撫
竝安輯遼人之在東省者是日未刻賊持國臣諭
帖一紙及鈔白旨意一道遣人送閱兩撫伐其狡
謀卻之

十七日賊四面攻城

辰時賊悉眾來攻東北西北正東東南四面受敵而攻西門尤急從臺上放大礮城垛盡碎用木垛暫堵而鐵子飛擊勢如穿縞守城士卒殆不能支楊鎮親冒矢石率眾拌命力鬪至未刻賊被創劇始引去是日輕重傷幾數十人死者近十人徐內府亦於左脇中彈賴甲厚不入

十八日賊鑿城西門總鎮楊御蕃焚卻之

賊仍環攻而攻西門益力守垛者疊木板障身參差礙目不能外窺賊遂潛身懸門下斧鑿門三四

凡許闔城惴恐楊鎮於城上穿一小竇斜透門外用功一夜始達投諸火器燒之賊始焦頭爛額而去

歸園記曰時賊蠶擁城下楊自抱萬人敵擲燒之賊立為灰燼

神武左營參將彭有謨使使來言將兵入援

卽於是夜復差孫高捷同彭下人韓子雲持兩撫諭帖調川兵入援高捷於路遇邏騎阻回子雲不知所往

下按院塘報

十九日知府朱萬年發兵掩賊

昧爽南門朱郡守發兵三十名突掩賊於睡夢中
斬首三級獲盔甲刀槍各一白鏹三錠首飾一包
賊負載東行

西城頭望賊俱車驢佗載子女玉帛絡繹而東
二十日撫鎮發兵掩賊

徐撫與防鎮謀出賊不意簡壯士五百人分二隊
啓牖出南門一衝南關一衝西關賊手足無措殺
傷甚多得賊首四級大礮八位鳥銃四門坐纛二

杆標旗四杆馬一匹盔甲四身瞭見賊眾四集卽
鳴金收軍人心大快

謝韶石曰賊自吳橋發難日無官兵乃
今一挫之然恐不畏死殊無撤圍之意

二十一日神武左營參將彭有謨帥師入援

有謨原領川兵防守旅順奉文移兵護登因自海
破浪而來知登陷圍萊遂率兵入萊郡北海將船
朝屯三山暮屯芙蓉往來無定晝則張幟鼓吹夜
則燈火鳴鉦賊選精騎五百往來護之以防登岸
是日夜半仍令舟中燈火鼓吹如故以誘敵人乃

自率人三百潛從小石島上海步行結陳前進至
演武場爲賊營巢彭分爲兩翼各架大小礮用長
刀護之且戰且行賊屢圍屢卻自濠外入濠內按
步徐行無驚迫狀啓南門受之軍容甚盛士民觀
者如堵無不喜躍有三十二人以不知路徑爲賊
所截遺棄礮數尊咸言可惜彭笑曰翌日卽當取
還耳時得彭兵楊帥之勢益振彭聞東北角掘洞
將崩遂率所部兵守之時韓子雲亦在麾下詢之
蓋十八夜遇邏賊與孫高捷相失子雲獨前揮刀

戰退四賊始能以信符沒師行壯哉。城中兜鑿
舊制用紅彭將因敵以紅帽為號恐難於識別下
令以黑色易之。○川兵未入之時每以多藥鼓傷
礮鏡致死多人至彭將入城礮之大小藥之多寡
方各有定數又每藥一觔以紙作一包急忙中便
無差錯又入鉛子之後以廢紙或舊絮舊氈塞緊
倘礮口向下便無墜脫之虞

紅土

硝

一觔

黃

一兩八錢

灰

三兩二錢

減鹵

硝

一觔

黃

二兩

灰

二兩四錢

轟雷

硝 十觔

黃 三觔半

灰 二觔半

震雷

硝 四兩

黃 一兩二錢

灰 六錢

信

一錢二分

蜜陀僧 六錢

斑毛 五錢

右用燒酒調勻日晒不見鐵

西洋

硝 一觔

黃 一兩八錢

灰 三兩

三眼

硝 一觔

黃 二兩

灰 二兩五錢

飛燕

硝 一觔

黃 五錢

灰 五錢

地鼠

硝 十兩

黃 八分

灰 三錢

大火箭

硝 十兩

黃 五分

灰 三兩五錢

小火箭

硝一觔

黃五錢六分

灰五錢六分

火線

硝十兩

黃一錢五分
不用亦可

灰五兩四錢

萬人敵

硝一觔

黃三兩二錢

灰二兩八錢

張北海曰自入援以至解圍凡二百餘日彭同兵士未嘗有片刻居停之適烈日暴雨無須使懈兵士服彭廉威八月之久未有怨言不強市人一物節制之兵於彭見之謝韶石曰彭參將膽勇沉毅履危若坦御卒更嚴竟日無敢譁者北海投余書述中天懸明月令嚴夜寂寥舉以似之綽有古名將風

二十二日巡按王道純塘報至

四鼓按院差人至則十三日所差塘報也云主客

兵萬計已抵昌邑

昌邑縣屬萊州府距府一百五十里實叩之尚屬

虛談緣王洪兵無紀律掠民更甚於賊反虛張賊

焰欲掩其失故聞者蓄縮不進耳

謝韶石曰武官怕死則已矣又從而煽惑乎念之祇深恚怒

濟南鋒營中軍朱延祿襲平度取之

朱中軍投進稟帖報前濟德諸潰兵復為王按院

宋登道

名之儒山西靈石人天啓壬戌進士

招集暗襲平度取之諸

兵據城列守為進取計兵約三千人

贊畫張國臣登道宋之儒以書稟至為賊求撫

午刻賊持張贊畫書一封宋登道稟帖一通皆爲賊求撫而賊殊畧無撫意謝撫回札有城下之盟恥不能從等語

賊入東北隧道

薄暮見賊百餘人竄入東北隧道抽執石戛戛有聲撫鎮及鄉紳謀發兵撓之往常出由南門未啓牕而賊覺之故每出不利今改從北門以攻其不備而北門土塞堅厚守北門任別駕殫窮夜之力漏盡始啓一扉魚貫而出爲賊所覺不果

二十三日焚賊洞城東北角崩賊三上三卻之

黎明師出北門川兵驍勇絕倫徑闖賊壘各兵鼓
銳乘之火罐噴筒鄉洞齊發洞中賊立皆煨燼果
奪大礮七位及其火藥而返方賀戰勝不意賊預
藏火礮於隧道中火引藥發城忽震裂輒挫而土
亦崩可二丈許角樓半圯礎落柱欹一賊目賴服
施氈鄉塌處望拜一礮擊中扶扛而去羣賊呼譟
急攻城上礮石如雨相持至申稍稍引去四鼓後
有賊突至意塌處可以平步而上乃三上而三卻

之賊之斃於礮者不可數計賊始氣沮方樓之崩
中懷杌隄不意據險斃賊反倍他處皆彭參戎與
麾下力戰之功也

附記 翌早朱太守率合郡
士民向彭參戎賀再造之功

二十四日築重城

東北角已陷城垣單薄謝撫遂檄萊州衛指揮陳
洪謨經歷王化聽用主簿張九叙集材鳩工幫築
月臺繫木爲膚內實以土約用班軍門夫三百人
初運土以筐頗礙俯仰命以布袋易之凡六晝夜

而告成

自南迤北而西長二十丈高三丈五尺闊二丈復於上修女牆高六尺厚六尺長如

之上施

堞口

儼然又一崇墉

附記

是役也鄉紳各輸木無數而李之茂尤多士子婦女老幼皆負土櫟築焉李字南居

兩撫咨部請師

謝撫與徐撫會稿遣郭尚文進京咨樞部代題請師謝起草而徐正之

臣徐從治謹題為援兵一步不前城守萬分危急伏乞聖明軫念封疆急敕進兵以解危城再調馬箭萬餘以圖善後事臣自二月初一日在萊州府

到任管事初三日賊卽圍城初四日攻起距今二十
十二日矣僅於初七日縋人下城齎奏到任日期
竝咨兵部塘報嗣後節次塘報俱送按臣王道純
監視臣呂直求其代題請兵不知曾達御覽否自
初八以後屢攻屢卻轉卻轉攻中間危迫之狀未
易殫述而最受害者在紅尼夫礮鐵子每箇重六
斤觸之卽折城垛盡傾守垛者無處站立至十七
十八兩晝夜很攻西門穴門以入幾陷矣圍城男
婦震號多方捍禦幸獲保全二十一日參將彭有

謨因臣與防臣謝璉發牌調援卽帶領川湖官兵
五百員名從島上來援本官忠肝義膽朗識沉機
立斬姦叛牟志皋等十餘人誓不與賊俱生一聞
調援卽能以五百人徑衝賊營入城連日搏戰捍
禦實嘉賴之卽飛將軍曷以加焉以視王洪之擁
兵千餘而惟怯氣餒遇賊先奔且布散流言虛張
賊焰俾援兵蓄縮不敢前皆王洪階之厲也事平
之後賞罰自有公典誰敢假之二十三日賊於東
北角掏成隧道暗藏地雷火延機發城忽震塌可

二丈許角樓半圯士民駭愕賊得意急攻蠡擁而
上者三總兵楊御蕃參將彭有謨率兵三卻之第
恐千丈之隄潰於蟻穴存亡乃呼吸閒事雖臣等
殫慮竭智往往以少擊眾奈金湯已有瑕可乘而
心力已消耗殆盡盼望援兵雖曰已經發行已到
昌邑究竟不見一騎一卒也雖監紀按臣王道純
沉毅明波誼切同舟必不以膜外視之者而未見
救焚拯溺之急著合城士庶於按臣不能無觖望
焉臣等唯有捐糜以報朝廷竊恐無萊則無全齊

天下事難言之矣臣謹會同巡撫登萊都察院右
僉都御史謝璉合詞具題伏乞聖明亟敕王道純
將見在兵馬星馳赴援竝敕兵部再調馬兵五千
川兵五千以爲後勁而賊氛可立靖疆宇可立全
矣若撫之一字是賊之所以愚弄孫元化於股掌
之上者而可再入其彀中耶觀賊攻萊不遺餘力
以必剋爲主卽狡悍攻城亦未聞以紅氍毹相加
者是何等狡悍而可再蹈元化之續乎臣等不得
不拈破以解築舍之議也

二十五日賊築礮臺於東北角

賊對東北塌角建一高臺上置紅斤礮四位連擊不已

發兵與賊戰於城南

撫鎮各出精兵及各鄉紳家丁共八百人出南門與賊苦戰自辰至午衝殺十數合城上觀者益倍敵愾之氣

趙士喆戰城南樂府曰戰城南戰良苦賊如蛇鼠伏壕堵來如風猛如虎礮如雷箭如雨使我前弗得前卻弗得卻顧視城頭但擂鼓門大輕進而善奔黃甲者誰觀望畏賊如畏虜可憐大頭龜孤立

無與伍得數賊級驢遍城嗟我軍民碎腦穴胸血
肉模糊安足數悵望西兵來不來城南之戰苦復
苦
自注 真休兵衣黃甲川兵縣盔甚大故有大頭
稱之

二十六日賊攻東北角

大礮連發不斷角樓頽圯將盡此樓因圯議圯今
委與賊費其火藥鉛子亦計也

賊入隧道

賊八十餘人闖入隧道人俱憂之

巡按王道純塘報至

四鼓得按院回報乃十八日所遣塘報始知濟南等兵入平度而津保兵已到昌邑矣

戶部右侍郎劉重慶上疏乞師

劉字耳校掖人萬曆丁未進士

奏為急請三鎮重臣各統大兵救全齊億萬生靈以存兩都咽喉以維宗社大計事臣等於本月二十四日夜有家報乘黑夜破重圍而來云十一二等日賊之攻城其利害十倍初旬先以西洋礮擊城東北角樓垛與人立時粉碎復攻東南城角亦立時粉碎如城北又挖地道兩三處每一孔可容

數十人矢石難加晝夜不休又將四城濠水盡放
入海賊眾遂往來如陸如此情形萊州以斗大孤
城恣賊攻打卽有撫府諸臣相泣死守旦夕斷不
可支萊去則賊西向而走青南向而走淮北向而
窺內地長驅直入處處瓦解天下事真有不可言
者矣時勢至此臣等計無復之惟祈皇上自爲社
稷封疆計赫然震怒立檄保定巡撫丁魁楚卽刻
移鎮統所部勁兵銳意鼓行由德州而東再檄天
津巡撫鄭宗周卽刻移鎮統所部精兵開道鼓行

由鹽山而東又檄河南巡撫樊尚璟卽刻移鎮統
所部精兵及磁州毛兵數千前後肅隊列陣鼓行
由曹州而東俱令自裹行糧限以時日直抵萊州
城下與鄧玘所將川兵六千人約會密計合力同
心用正用奇相機而進期於立解萊圍盡滅此賊
而後朝食則天下大事尚可救也非如此大徵迅
速雷霆自天而下則人心必不能奮賊梟必不能
奪萬一循其故套復將後所徵津保之兵漫一嘗
試將來鮮有不爲王洪之續者事機如至再失皇

上雖欲急而更求愈無及矣臣等為皇上封疆痛心疾首非徒為臣等桑梓痛哭流涕也臣等不任叩血待命之至

四川道御史王萬象上疏乞師

題為逆賊猖狂愈熾孤城旦暮難支乞請重兵彰赫怒以拯三齊以救萬民事臣於二十四日接塘報與家信言賊前後攻萊加倍緊急於北城下安置紅氍毹三位鐵子大如升城垛當之立碎守人當之立齧於東北角掏穴五六處將及於城於西

門外結土爲臺與城相埒又於城八九十里內邨
莊盡被火然子女俱遭殺戮自古及今未有如此
賊之甚者且賊有馬騎五千步卒萬餘而我馬騎
不足二千步卒不足四千眾寡不敵無怪乎賊之
狡而且橫視萊城爲掌中物也臣思萊城以偏海
之區承平日久未嘗經亂一旦猛攻惡戰屠毒過
慘民不堪命矣使非萊城多慷慨忠義之士罄家
護國寧死不懈烏得殘喘歲月以苟活於今日也
言念及此實可寒心伏祈我皇上念二東累卵之

危無時可待萬姓倒懸之苦惟日是悲敕調東江
大帥黃龍率領精兵五千由海道而來以撓其東
恢復登黃等處蓋賊之妻子俱住於登賊聞之未
有不罷兵自援者此伐魏救趙之計也再調涿州
總兵王業隆率領精兵五千由德州駐劄昌邑昌
邑去萊百餘里實為輔車相依今有兵為犄角之
勢進則可以為萊之羽翼守則可以牽賊之肘腋
矣又何患賊之西向也再調津門參將陶曾齡率
領精兵五千由北海而進屯兵於王徐寨

距萊城
九十里

蓋海邊居民鮮少去京師爲較近賊不能下萊安
冒老死於登勢必泛海以窺京師此處屯兵一枝
賊卽詭計多端亦不能飛騰而渡矣再調義勇總
兵劉澤清率領精兵五千鎮守平度賊每言不久
便上金陵殊不知南上必經運河運河騷動軍餉
必至不給內外必至告匱矣所係於國家非淺也
今有兵以阻之不亦釋皇上南顧之憂斷逆賊金
陵之想也哉再敕山東巡按王道純將本省現在
人馬計其數會其期以與各路總兵官聯絡照應

四面環攻使賊首尾不能相顧進退兩艱賊雖兇悍未有不聞風而逃者也叩祈皇上嚴敕兵部徵調各路總兵官奮勇前來同心協勦庶累卵之危可轉而為安倒懸之苦刻刻而卽蘇矣

二十七日張國臣差都司金一鯨為賊求撫

國臣遣一鯨持書為賊求撫徐謝俱登南城繫一鯨上微探大兵及賊情形復遣詣賊反覆諭以大義令其回登徐竢區處抵申一鯨來回話述賊謾語謝撫投袂而起徐撫曰爾與賊說賊善攻我也

善守我若守不住此城不算男子且賊旣講撫張贊畫何不親入城來耶一鯨下城宿賊營

二十八日金一鯨復入城

一鯨復上城求致書按院及贊畫且求差官偕賊使同往金語氣張皇知爲賊說徐撫欲斬之苟有爲之解者因縱去

二十九日發兵壞洞萊州衛百戶白仲仁死之

發兵出南門爲誘陰出北門掘東北角隧道我兵在隧道不能出者五六人被礮死者四十餘人輕

重傷者二百餘人百戶白仲仁數立戰功今死之
然隧洞亦遂塌穴賊不敢入矣南門與賊衝殺我
兵亦傷四人

謝韶石曰賊掘隧道六七處皆陸續絕人燒塌惟
東北洞護之甚嚴洞口可容百餘人內分三股一
對角樓一往南一往西今傷人
雖多而救闔城生命不得不爾
附記 仲仁為礮子中腹皮破腸露眾昇入城仍
鉅納腸腹內令人用線縫之畧無痛楚竟以風入
不能療而死後亦
未有題錄賚卹

夜攻城我兵擊卻之

二鼓賊攻東北角執挨牌直抵城址欲從塌處直

上彭參戎任別駕督兵擊卻之且卻且前傷賊甚眾四鼓又兼攻東西二門及西北角皆擊卻之

三月初一日賊四面攻城

三鼓賊突如其來四面喊殺雲梯十數架齊擁近城躍塌城而上者數次城上併力禦之礮石之聲雷震電激衄賊亡竿平明賊始引去

賊開隧道於西門北

賊又於西門北水溝處掘隧道而城更單薄謝撫乃檄指揮陳洪謨主簿鄔鶴齡幫築重城規模一

如東北角

毛荆石曰姦細余五化曾與有德言先日修城唯東北與西門物力稍薄故賊攻此二處尤急云
賊始列寨於濠外

賊於城濠外重重列砦掘塹深闊人馬不能越穿

連大木

皆拆四關房木爲之

高厚牢密曲折環繞閒開一門

止容一人出入砦柵繫狗毛索懸鈴防守之嚴甚

於晉安之圍

初二日醵兵餉

兩撫集鄉紳士民醵金犒兵得五千八百兩有奇

賊入東北隧道

東北隧道悉皆燒塌而賊顧戀不捨時時覷視蓋此處用力獨多受傷亦最逆知其必另作一穴也

初三日賊掘西北隧道

賊掘西北隧道甚厲令人入溝潛聽聲徹城腳繩五人掘之城上護者少疎為賊斬其一礮傷其二

附記 賊從濠外送飯者多被礮擊賊因以草囤盛飯兩邊以長繩牽之亦狡矣

初四日巡按王道純塘報至

四鼓塘報至知屢次趣兵中樞不應僅發鄧玘領

川兵四千其援期尚杳然也

附記 是日張北海與徐標辦事欲於西甕城開一小北門蓋以賊掏洞甚急西城垣又薄兵出南北門路遠而賊易防徐堅不從而止

初五日總兵劉國柱遣騎入援

黎明國柱發騎兵六百來援據稱行至南關馬誤陷濠因被賊衝散其半於是入城者僅三百七十五員名後訪知賊竟未與鬪但於林中吶喊怯者卽逸還耳統兵則天津參將李景真保遊擊張汝行都司李楠守備折雲也

附記 賊縛一真保兵至西城下兵大呼曰大
兵將到可堅守城賊立肢解之惜不知其姓名

初六日

初七日大風揚沙如霧張國臣遣人持書為賊求撫

謝韶石曰張贊畫為賊求撫且據塘報具題謂賊
一聞天子詔便撤圍不攻嗟乎張欲愚賊反為賊
愚金一鯨以之欺張者因以之欺兵部如盲人言
視模糊不詳舉以入告何其異也夫身不處重圍
之中目不覩攻擊之苦止憑姦弁狡賊一片飾說
輾轉誕謾觀強敵如兒戲可為寒心非余與徐肩
老力排其議其不墮賊
術而為登續者無幾矣

張有恒自登回

有恒係徐撫差往登州下閒書於耿仲明者回云

未能至登於路聞毛承祿為賊邀岸上屯軍教場
李九成賞毛兵每人銀五兩則承祿又從賊矣

承祿

毛文龍義子之
首廣鹿島副將

初八日賊掘洞

賊尋東北舊穴另開一洞可容六七人西北之洞
可容十餘人兩處濠岸斗絕礮矢不及故賊肆力
穿鑿

初九日撥津保兵分汛守城

撥遊擊張汝行督兵專守西北穴處都司李楠督

兵專守東北月城參將李景則率領本部聽候策應畫疆枕戈之中歛以血忱莫不人人感憤

發馬兵遞塘報

每夜塘報俱被沮回楊總戎定計挑選精騎十一騎鄉導一名翼以步兵六十名漏下啓南門銜枚迤西疾行步兵齊力拔寨騎兵乘馬飛馳比賊覺已越數里矣步兵整隊而還

附記 時望馬兵去遠相與大快
徐撫楊鎮及張考功共飲南城樓

初十日

十一日東西女牆俱告成

兩牆皆取鄉紳所貯大木橫豎障土故築成之速

謝韶石曰萊人尚義捐資不吝而張北海趙芝庭尤倡率不倦晝夜登陴共効綢繆

賊焚城外民舍復掘塚墓

謝韶石曰時四關房舍賊盡付一炬不留半棟搜野伐樹春鳥不巢攻城掘洞皆驅難民為前鋒用命者無不當我礮石不則立齒賊刃進退皆死積屍如阜又遍發隴墓取其板以為挨牌士大夫佳壙則倒其骸出之以易賊屍荼毒所至不遺泉壤萊人何辜遭此浩劫忍無封事乎恐鄭監不能繪耳

十二日大風晝晦

十三日知府朱萬年徵馬芻

時倉中積穀二萬餘石庫中硝黃約數萬斤

乃萬曆時

收惟馬草告匱朱守乃同諸生十餘人持簿沿門

徵草有如募化得草萬束足兩月之用

謝韶石曰朱每事持簿計年靳惜上下呼

為掌家翁圍城中事事不缺皆其力也

附記是時民閒草舍盡號以待用城中柴價頓

昂朱守伐各處樹株拆各處磨署減價以濟民炊

作懸樓

楊總戎以西門外洞將及城乃命家丁楊進忠作

懸樓命壯士持火包燒賊洞口賊俱灰燼

懸樓之法城上架木為梁取巨木長五尺者直擔
梁上橫出城牆之外巨木之稍兩旁各輔一木皆
長丈許上用木板周圍作障狀類船倉中藏五人
用滑車以麻繩循環挽之曳至稍頭竟垂洞口擲
入火罐製度甚巧惟夜間乘
賊不覺為之礮矢俱不能中

十四日雨

一春旱魃似佐賊為虐至是百卉浣顏諸峯沐膏
憑城一望翠靄撩人

賊負重入西關

賊毆牛馬數百負重入西關不知何處又被鹵畧
也○薄莫賊用水將西門北洞口火灌熄礮傷城

頭數人。彭參將東北角亦礮死出洞賊七八人
十五日發兵擊賊

撫鎮發津保兵及家丁五百人出南門擊賊令百
姓隨之搬運木植以供炊爨衝打移時生禽二賊
各兵爭功遂斲其首陳殺一賊曰項進忠虎軀狼
音素為諸兵所識蓋有名驍賊也獲礮八位旗一
杆甲一領驢三頭我兵亦陣亡數人。東北角一
日一夜擊死洞中送飯賊十六七人

賊礮傷西北垛

賊用紅巨礮擊傷西北垛口夜閒用土坯砌之賊密放大礮泥水匠釐粉者三人

保萊全書曰是日李九成殺牛馬豬羊祭天地關聖祈佑破萊因討籤得下下兆賊眾減色及東北角敗後李賊怒斬神像有德援辭止之李賊歎曰萊城一壘竟是鐵壁銅牆自此以後只堅守以待內變可也

十六日議平糶法

謝撫慮圍城中貧民乏食乃委聽用主簿張九叙

於公所發糶倉穀

每斗錢三十文填紙印票赴倉徑支

又勸諭紳衿

及素封家減價平賣人盡忻悅鮮有菜色

歸園記曰守垛人役楊鎮家丁約四百彭兵三百
湖浙兵二百真保津門兵丁三百五十名萊營兵
不足千名班軍二千餘名門夫三千餘名門夫支
倉糧日廩二分自備飯食班軍支倉糧紳衿各家
分班造飯仍支日廩四分五釐各處兵丁除月糧
行糧馬草官給外仍分各家供養日三飯給酒麪
魚肉後園久漸不鹽宦紳之家仍止許
及僕人士民之家則有不可言者矣

護月食

初更撫鎮等於南樓護月鼓聲斗發羣賊驚竄良
久乃定禮成謝酌諸公酒從容勸酬頗有雅歌投
壺之致○東北西北兩角川兵擊死賊共十七人
十七日西北礮擊死一賊首

賊營中編素攜紙錢帛孝

都司鮑守正焚賊洞

二鼓謝撫遣都司鮑守正率兵丁二十名各持火
罐從塌城而下直進賊洞賊五人迎敵立殲其三
因縱火焚之獲其鳥銃刀槍各一

鮑貌侵而
甚勇敢

十八日都司鮑守正復遣人焚賊洞

賊洞未塌鮑復遣人燒洞有張刷兒張三兒貝守
德三人者自入洞後杳無影響至二十日巳時始
自地中孔躍出而上詢之云賊洞長不可計闊有

丈餘深入土七八尺盡力仰鑽始透一孔透露隙
光極洞所至已透城根復自下而上架木爲級剪
照以燭其爲力甚難而其爲計亦甚巧矣如刷兒
等蹈險不懼亦卒伍中之不畏死者

督理劉宇烈及總兵鄧玘兵俱至青州

劉號蒼嶼四
川綿竹人萬

進士
丁未

時兩撫被圍在外調度惟巡按一人朝議更設督
理以兵部侍郎劉宇烈爲之更調薊門川兵四千
統以總兵鄧玘監以右布政楊作楫

號漱石
四川人調密

雲兵三千統以副將牟文綬星馳赴援至是俱抵
青州

十九日立夏

張北海曰城外小環海碧花柳媚
嬌圍困城頭不能遊眺真爲短氣

二十日賊西北洞塌

黎明西北守城人見城邊有檣隱隱浮動急以懸
石捶之應手而塌火藥柴薪亂投延燒燬裂幾三
丈賊復於迤北另掏一洞石撞不開徐撫於城上
貯穢惡之水晝夜傾灌自是賊入者寤少

張北海曰賊本來時未守於城下密釘木橛以絆馬足賊來毫無所用每次縋城繩斷多被橛傷惟此得橛之力耳

二十一日焚賊三礮臺

亭午楊鎮以火箭燒其近濠草房因延燒賊所築北臺徐撫曰如得西北風便可燒南臺張考功曰一箭而去一臺已忤人意公仍望蜀耶言訖西北風大作楊鎮復命家丁以火箭射之貫入南臺意亦未必卽熟轉盼閒烟從木起已而火發升騰赫烈勢猛燎原羣賊掬水競救如沃膏油遂傳彭參

將效而射之連發數矢僅著其一而火光已燭天
矣臺上銅紅石礮爲火猛所鎔毀自臺墜下是役
也瞬息之間三臺立盡燔死守賊無竿豈人力也
哉

歸園記東北角焚
臺乃任別駕事

二十二日謝火神

郡守備牲醴請撫鎮謝火神

發兵擊賊

亭午撫鎮發兵五百出南門東西分撲斬賊一級

百姓運入木植無筭

二十三日賊置大礮於海山亭

賊於海山亭上置紅巨大礮直擊東北角樓城堞
塌崩守堞人死亡相繼

錢贊伯曰予聞之父老云城上亦於東北角置大
礮對打礮子直入賊礮腹中多方不能出爲之噴
飯但不知事在何日

募銅鐵冶礮子

自擊賊以來日用礮子數百斤朱公恐不繼因募
銅鐵鉛錫數千斤鎔鑄以待仍令石工削圓石繼

之但石子不能透木至遠耳

夜雨遣人齎奏竝遞塘報

薄暮徐撫院差劉應坤入京齎奏王定國遞按院塘報

徐疏畧曰國臣以撫為叛兵解嘲而叛兵即借撫以為緩兵急攻之計國臣使每一至則外攻轉急國臣曰我不當縋兵出擊以激其怒也則必使其任意攻我我拱手以萊送之如孫元化送登州已事而後可成國臣之撫乎當叛兵之過青也舊撫

余大成擁師三千追擊甚易元化貽書云撫局已就我兵不得往東一步以致壞事大成如其戒而止及至登城被圍明知張燾兵陰與賊通又使燾引兵出戰是倒持太阿而授人以柄也且信誑開門致登城數十萬生靈盡罹鋒刃今萊城被圍叛兵視臣猶元化也乃國臣公然爲之解曰吳橋激變有因也一路封刀不殺也一聞詔使遂止兵勿攻也吾誰欺欺天乎今元化入京已久又得國臣僞報盈庭集議必以爲一紙書賢於十萬兵援師

絕跡不來職此故矣臣當死為厲鬼以殺賊斷不
敢以撫面謾至尊淆亂國是陷封疆而殘生命一

誤再誤不可收拾也

疏入中朝
不以為然

張北海曰是夜雨聲霖鈴不絕城樓秉燭與謝
韶老苦茗相對談詩話昔困苦中尚多雅況

二十四日賊復入東北角洞

城頭礮擊死數人

賊環圍東北角

彭參將用礮擊之轟轟一夜不絕

附記 謝撫乘馬視東北角經一夾路忽一鐵子
從中頂飛過著民舍牆上命從者視之透牆尺許

二十五日賊海山亭上放礮

附記 是日將謝撫軍公署臥房瓦椽打透復從窗榻打出仍將川堂壁柱剝損乃墜入地。西門外洞已塌而賊仍在內日將夕張考功與徐撫軍並肩在西月城看兵灌水轉至樓堦一鐵子從面前過擊樓牆墮地復起賊張右脛青瘡微疼徐公以手為之撫摩

督理劉宇烈巡按王道純監視太監呂直暨總兵鄧玘劉國柱王洪鼓練山東義勇副總兵劉澤清統領新兵參將劉永昌朱延祿監軍道楊作楫監軍推官汪惟效等俱次於昌邑

毛荆石曰春秋大義伐而書次其次為善救而書次其次為貶故救邢次於聶北譏其救之不速也

茲之書次亦
猶此意也夫

二十六日賊攻城

夜三鼓羣賊急攻東北角已而四門四角無處不
攻喊殺震天列燭如晝賊先於東北角隧道中用
火藥轟樓樓基崩頽無餘賊眾蠡擁齊上二三百
人已駢附重城下但倉卒不得其門川湖兵憑城
鏖戰長槍連背刀從女牆上逆擊之閒以火罐順
城礮賊頂背受創踉蹌滾下三進三卻賊屍幾與
城齊西門西北角危亦相埒又賴楊總戎以免擊

死賊亡筭濠水為赤天明引去拾雲梯七架燒毀
五架皆高可五丈上作屋狀覆以生牛皮下拖鹿
廬

張北海曰東北角城塌賊蟻附偷攻至重城不能
進川兵始覺而禦之礮火一明見盔甲燦耀經礮
一時踏地是役也賊併力很攻已視萊為掌中物
非彭將死守城不陷者幾希是為全萊第一大關
也

二十七日賊西北列一大營

督理劉宇烈誓師

以鄧玘為中營劉國柱為左營王洪為右營以都

司王文晟統輜重督運糧草渡新河而進又令劉澤清等兵從南路平度進俱約初六日抵萊城

毛荆石曰書賊列營於前以見萊城倒懸之苦紀督理誓師於後以著諸將逗遛之辜

二十八日有穉子來奔

有穉子奔詣南門繫上供云曾於棲霞遇本處差人持按院公文言大兵從青州進發有經畧督師領川兵萬人不知信否

二十九日灌西北賊洞

灌水西北洞中賊發礮將水溜擊斷入夜復另為

木溺灌之

三十日發兵護門夫掘洞

因西北掘洞已久慮有東北之患發兵五百人出
北門徑往撲之又令班軍門夫二百各執杵鑊專
司挖洞挖未竟賊放紅巨大礮擊死門夫三人遂
撤退我兵與賊相持良久獲級一顆西洋鳥機三
門百子礮一位坐地礮一位盔甲四副倭刀二口
洞中難民乘便弄出者十有三人稱洞中浸灌臭
不堪聞不復能施挖鑿往但知攻洞火為上策不

知水攻得力之若此也。難民言島中船乃賊船
島中逃難民有四五千賊皆屠戮之

夏四月初一日頒賞出戰官軍有差

疏水口

二鼓縋二兵三門夫下城疏水口

附記 保萊全書曰是日北關有護礮賊二人甲
欲歸順無由見北門提棧遂令乙放礮礮尚未然
甲已將乙斬首於地提級走我軍中兵復欲殺甲
奪功任三府大呼救免入城問之殺賊者乃難民
李從義也特施賞資
奪功者杖之示儆

初二日幫西城

上特遣中使送紅氍毹六位至沙河交付援兵

初三日發兵擊賊聽用官王鏡死之

撫鎮發精兵出南門官丁秦大鴈等奮勇追賊直

至稽古寺

在城東南

互有殺獲但沿寨礮多不能久戰

賊旋從後掩襲截為兩半謝撫大呼敢死之士往
救都司王泰初成欽命皆以奮勇往援各帶重傷
聽用王鏡素稱驍勇戰死之

初四日賊騎西行

賊騎四出俱西南行後屯聚福祿山往來聚散似

有迎敵意

焚賊屯積器械

西城門兵丁放火箭燒賊草房六七十間屯積器械皆焚

初五日芙蓉島有船

遙見戰艦四十艘揚帆西來泊蜉蜊島

即芙蓉島

附記 是日賊彈擊傷一小所將死又蘇云我將去矣有船三隻裝人已滿二船半今選我入船不久滿矣言訖而絕

初六日聞西南礮聲

聽西南大礮數十聲約四十里許黃昏數聲四更五六聲

謝韶石曰薄暮閒步城頭聞西南礮聲隱隱急走報徐楊二公大兵之來不必斬將奪旗舉解取錢但聞其聲已不覺神氣飛揚矣

初七日總兵鄧玘等帥師與賊戰於沙河獲其頭目

陳文才

我兵抵沙河賊來迎戰互有勝負獲賊目陳文才城中聞西南礮聲

西南礮聲連珠不絕。是夜雨三更後仍有礮聲

附記

徐撫楊鎮治具聯轡至

謝寓

並邀徐翟二內府同飲

初八日劉澤清之師敗於神山下復引還

日晡賊自西而南未幾見神山下有人馬彼此相對放礮城中驚喜以為大兵至矣少頃寂然有二三標馬賊俱入東嶽廟內初疑賊自作攻擊之勢誘我後乃知為澤清自平度領兵入萊遇賊而兵潰劉尚力戰為賊斫傷右手三指仍持鐵鍊擊賊惜力孤轉去耳

趙芝庭曰是役也劉率鄉兵滿萬人已至南山下距城五六里賊以十八騎蹙之遂敗遁大為短氣

毛荆石曰按圍城記云賊步率數百由西而南直據神山下扎營復有馬兵數百作攻打之勢則十

八騎之說

恐近於誣

保萊全書曰有提級獻功者已領賞訖兵妻孫氏認係其夫王喜首級將冒功軍士斬首傳示

附記

謝撫治有酬答四公蓋雖處重圍猶不廢往來之禮云

初九日都司鮑守正中礮死

兩撫以秦大鴈操練班軍門夫鮑守正操練萊營兵丁在大倉內忽一升大鐵子擊倒房牆輒中鮑腦而死

製竹槍

平叛記

卷上

六十四

朱守製竹槍五百餘杆皆庫中夙貯亦奇事也

初十日西南有礮聲

辰刻西南礮聲甚壯若交鋒者賊在城外亦數處
礮蓋賊俱迎兵恐城中兵出劫寨故放礮以撓惑
之

縱陳文才還

毛荆石曰武夫力而拘諸原婦人暫而免諸
國縱寇殃民教猱升木開外之罪可勝誅哉

賊焚我輜重

進兵八日更不前行賊知宇烈等無能爲以兵繞

我後盡焚輜重糧草八百車

謝象三曰是時馬步兵二萬五千兵勢頗盛說者以為解圍在此一舉矣而孰知三鎮俱不諳兵事三營合一人馬雜揉絕無紀律又不分犄角張聲援糧草在後委之少年都司以鄉兵千餘護之進兵八日更不前行口遣信使與賊往來講撫多以金錢膏送陳文才還賊以悅其心於是賊覘我虛實知無能為陽以撫愚我而陰以兵焚我輜重云

張北海曰運糧官王文晟綺統之子也過新河東見賊而逃賊殺死運糧百姓至今白骨如麻毛贊曰城子河畔白骨即運糧百姓為賊所戮者也事平後無瘞之者以故往往為厲迨康熙初年傅生收其骨厲始絕余過膠東時蓋聞之父老云

大雷雨

入暮大雨城頭兵士皆在盆傾淋漓之中須臾止
十一日小石島有船

西來戰船約百餘艘徑泊小石島

西南有礮聲

聲在斷續之間

賊射入謾書

言大兵已敗云云

十二日海山亭賊發紅丸礮不絕

總兵鄧玘塘報至

鄧鎮差川兵王應舉李仲良持塘報至偷寨而入
賊詰之舉操遼音以對良不能刺一槍急薄城繫
而上言大兵已抵沙河連戰二三日俱我兵勝經
畧劉按院王俱駐昌邑上又特遣中使送礮至沙
河夫督師不輕置而特使送礮尤屬曠典廟堂之
上猶未忘萊也音問不通者彌月得此為之抃舞
第來人祕語云我軍中輜重已盡為賊焚燬軍行
無糧是為可憂耳

十三日督理劉宇烈棄昌邑走三鎮俱逃

時我兵中斷音息不通昌邑警報狎至訛傳三軍
盡沒賊擁大眾攻昌於是宇烈棄城走青州惟監
軍道楊作楫推官汪惟効誓死不去宇烈又傳諭
三鎮撤兵就食玘等聞之夜半拔營薨然而散賊
乘之大敗爲賊擄者無筭大礮火器悉委於賊王
洪劉國柱逃回青濰鄧玘逃回昌邑

十四日海市

突出一山三峯了了往惟登有之今創見亦異也
下姦細羅宗禹於獄斃之

日將暮津營兵羅宗禹至城下繫上言我兵被賊
燒糧諸兵無糧因各下鄉邨按糧今日被賊擄來
又云王洪與賊講撫再三鞠之乃王洪兵於新城
從賊者使秦大鵠引之密室細按於脇下得紅帽
汗漬浸濡錮獄斃之

十五日緇人焚賊窩舖

辰刻守東城寇同知遣兵丁張東才等十六人各
持長矛緇城下徑薄賊寨焚其窩舖及火藥一率
刺一賊中之奪其槍而還十六人無被傷者

賊鼓樂西來

午後賊三四百騎結東西來鼓樂前導以示得意

城上視之蔑如也

附記 張北海曰午閒徐撫臺忽在顧小齋相對坐談至申方去徐面黃有憂色言西兵咫尺不能進萬一再有蹉誤天下事不可言矣詎知翌日公卽罹變乃先日與予談乎痛哉

十六日巡撫徐從治中彈死

未刻徐撫被彈闔城官紳急奔往視見公仆地頭腦已裂痛哭欲絕軍民哀號如失怙恃謝撫經理其喪事府縣為製造衣衾諸物

附記 所用棺木為侯生名覃祥者家藏良杉也云值四五百金侯未受一值可稱好義者已

謝韶石曰圍中七十餘日朝夕晤談事無大小必以相諮難中失此良友酸痛如何

張北海曰徐撫舊平白蓮素諸軍旅圍城中設奇運謀無不動中機互而撫循士卒駕馭將佐所以

人樂為用命公未中彈時先二日在西城為人言曰夜夢二星俱晦一星為人救明一星未幾而落

嗟嗟軍隕大星妖夢是踐么膺逆叛職我重臣而尚欲以撫結局是誠何心乎

趙士喆曰公以監軍至萊擢開府守萊半載為飛鏖所中而率公寬仁長者善得士心三軍之士無

不為流涕焉

叱馭孤忠動鬼神時危盡瘁竟亡身健兒莫灑英雄淚全節如公第一人

徐忠烈公墓誌銘曰公姓徐氏其先處仁以尚書從宋南渡僑居姚江四傳為彥明令嘉禾

占籍海鹽今為嘉興海鹽人也公諱從治字仲華
會祖璚祖鼎父應奎祖父皆贈資善大夫兵部尚
書妣皆夫人公之祖病隆冬思食瓜父泣禱於西
疇瓜累累臥豪葉下人呼為孝瓜徐母黃氏夢金
甲神執干舞中庭寤而生公甫四歲海潮夜溢牀
榻簌蕩忽有厨浮牀下端坐而免十歲讀袁紹檄
豫州文拍几歎詫塾師問之曰恨不生當其時手
戟老瞞耳萬厯癸卯領鄉薦丁未舉進士知安慶
桐城縣勾稽畝稅平亭獄訟暮年而大治大水浪
過峽山口視其刻石曰宋理宗紹定四年洪水至
此蓋五百年矣乘船破浪軒頓巨浸中相度捍禦
灑沈賑饑全活無算水降按行圩岸築堤八萬七
千餘丈晝夜雜作土實石堅水不復為害居官彊
直不善事御史外計當量移自請改武學教授轉
國子助教遷南京禮部主事至郎中知山東濟南
府屬邑官吏解銀林立堂下公援筆判牒尾次第
舒鴈引去東方多事募百金之士捐金推食搏力
卒其後征妖悍萊拳勇歛集蓋取諸此也舉治

鄒卓異賜金錫宴陞山東按察司副使分守兗東
而白蓮賊之變作公受命監軍輯刀策馬亂漲河
衝黑雨夜半入兗城賊塞路要遮弗顧也大軍將
攻鄒公語大將楊肇基曰兵法攻城爲下賊精銳
聚紀城夏店踞鄒滕之中吾擊其首尾其中必兩
救不如擣其中堅中堅破則兩城皆瑕矣分一師
陽攻鄒大將從閒道疾趨攻嶧賊惟駭焚其營寨
奔滕賊之大勢熸矣我軍圍鄒未下公曰師老矣
頓兵城下無益不如分兵勦滕斷其右臂使不得
相救鄒可立破也乃率三將簡驍勇直擣滕城賊
棄滕退保兩伏山以輕騎躡擊之而逸者勿追伏
山之賊盡矣於是急攻鄒鑿城通道賊泥首乞降
擒賊首徐鴻儒獻捷赦脅從四萬六千有奇觸言
矢石榴沐暑雨巢車晝望鉦無夜偵在行閒六月
勞不解甲倦不支枕計殲妖之伐公功爲多陞布
政司右參政分巡濟南叙功加右布政使督漕沂
南會蓮妖再發東撫王公惟儉謂非公不能辦賊
題畱守沂按臣力主撫與公異議遂請告歸養

中外計量移卽家起薊州兵備尋加左布政使東
警益急薊撫皆庸人不可與共事復移病歸里不
兩月遵化陷薊撫伏法而公益見推重辛未起山
東武德道兵備及淮而孔有德叛攻陷濟南六邑
倍道宵征赴監軍之命於萊無何拜都察院右副
都御史巡撫山東二月朔與萊撫謝公璉同日受
事卽日賊已抵城下自二月四日至於四月肉薄
環攻不舍晝夜礮石星流飛矢雨射城中蒙頭而
炊負戶而汲公意氣自若激厲將士拊巡夷傷獲
止麗譙誓共生死賊舞梯衝攻我自三旬至於八
而我伏槍礮須其上而擊之賊築高臺瞰我自一
臺至三四臺我縱機火焚其臺而墮之賊掘地道
穴我深可旋馬自一洞至數十洞潛隧響穿城隅
迸塌幾陷者數矣我用穴塹寘壺焚穰縱火之法
薰尸滿窟賊死者無算公又與總戎楊御蕃遊擊
彭有謨選擇死士懸門突擊後先搏戰殺賊數千
人贊畫主事張國臣奉撫議以出援兵皆畏賊左
次主者亦聽之以爲撫成則萊開自解姑以援萊

為名耳三月初國臣遣使為賊求撫公嚼齒大罵
安得上方劍斬此大姦細乎乃抗疏白其狀奏入
大拂中朝意時公方重圍固守無以罪也而賊徒
益棄疾於我四月十六日架元化所遺西洋大礮
攢擊城西南隅勢甚厲公方簡閱丁壯指揮出戰
左右請少避之公曰不可語未絕口礮中額額身
仆血管中萊撫馳而撫之絕矣萊人大臨守陴者
皆哭其子同貞等自潮來奔亟扶櫬返葬朝廷聞
而傷之追贈資善大夫兵部尚書蔭一子錦衣衛
百戶世襲予祭葬賜祠額曰忠烈嗚呼兵部條上
方畧固曰萊撫守萊東撫駐青調度公不入萊可
也公不入萊必不死公不死而號於人曰我奉詔
駐青不敢失尺寸雖亡萊不任受罪也公之意以
為東撫控壓全齊駐青不足以鎮萊人之心而入
萊則可以繫全齊之命委一身於孤城示全齊之
人以必死而劫之以不得不救是公之居萊者所
以救萊也賊盡銳合圍累旬浹月慮我師之繼其
後必不敢解圍長驅狼豕奔突是公之守萊者所

以保全齊也賊致死於萊力盡不拔勞瘁單乏師
老形變解圍之後以全力賊登賊三鼓氣竭技梧
撐拒不翻城內應則銜尾宵遁是公之固萊者所
以復登也柳子厚論睢陽之事曰俾其專力於東
南去備於西北力保於江淮而功靖乎醜虜以此
論公斯得其大者雖然世知公以死守萊之為功
而不知其以死拒撫之尤為功也賊以撫謾登以
撫謾萊且以撫謾中朝而獨不能謾公公死之後
馴至於侮明詔戕命使而萊卒堅守不下公以死
持之也故曰其功在萊登之撫疆吏主之萊之撫
中朝主之公之拒撫非拒賊也而拒中朝也拒求
撫之賊易拒主撫之中朝難以死拒賊易以必死
拒中朝難故曰其功在社稷嗚呼斯其故難言之
矣公為人孝友廉潔正直忠厚矜細行勤小物和
不徇人介不絕俗蓋質有其文彬彬名實之君子
也為吏去觚角絀雕琢有所施設機張鍵閉往往
能出人薊門軍索餉圍撫院於遵化公單騎馳入
陰部署彝丁標兵分營四門按兵不動登城而呼

曰給三月糧趣歸守信地不將擊汝眾聲誓如雷
薨然而散其沈機應變類此而惜其所就之止於
此也公歿時六十有一妻黃氏累封夫人子五人
同貞思貢生襲錦衣衛西司房理刑副千戶有貞
益貞濟貞復貞俱庠生女一字譚某崇禎七年十
二月二日葬於曹家湖之阡在海鹽縣西三十里
公宰邑考文所取士多以文章風節著周忠介順
昌方御史震孺宮諭拱乾其尤也於是同貞屬宮
諭件繫事蹟為行狀而介御史以乞余銘銘曰內
外交誼王畧其否專城失守列郡風靡婪婪孔賊
閒釁反戈月暈重圍雷轟專車援孤虬蟬控絕虎
豹誓命沈城碎首飛礮公雖隕節萊完登復虛危
之壁四履如幅還西畿東朔馬縱橫金梯罷擊和
門不扃禍牙樹蠹孰非臣子委而去之如脫敝屣
公碎一身以奠全齊使知國邑重於命軀帝厯勸
節峻逼台司逃臣骨驚志士髮植享祀有嚴鄉夢
不假睢陽廟中雒陽城下忠表汗竹烈光羽林斯
石幽竈永質古今

飭守城兵將

謝撫嚴飭守城兵將貼信無譁

賊使擄民送入謾書

十七日巡撫謝璉戒嚴

五鼓謝撫徧巡各城戒嚴有加文武官兵素憚謝公之嚴今見其披誠樂易人心大驩

賊三面放礮

賊於城外三面放礮傷人甚多

總兵吳安邦帥師襲登州不克遁回

先是登州總兵張可大勦難逆以副將吳安邦

之安邦

濟南人

尤怯鈍奉令屯寧海窺取登州值有

德等俱圍萊惟耿仲明守登揚言據城歸順安邦

信之率文登營兵及土兵二千餘人與中軍徐樹

聲襲登十五日從寧海進兵至是夜抵登離城二

十五里下營樹聲先薄城城內礮響賊兵遽出樹

聲被擄安邦遁回而南路擣巢之賊又見告矣

毛翰石曰予按視師記于鄧玘王洪劉國柱則曰

三帥俱不諳兵事于吳安邦則曰尤怯鈍將將知

此則安得

不亡乎

十八日賊放礮不絕

謝韶石曰自宿城頭以來每夕多人帽聚縱橫疊股而眠氣蓬蓬然若出甑之飯前此天涼猶不甚苦至此則鬱蒸悶人終夜作惡早起四望諸山雲霧如幕上馬微雨徐來撲面沾衣頗有爽致漏下大雷雨夜半止

十九日賊放礮

礮子落城內傷人甚多

秦大鵬射死一賊

賊在城外拔寨一賊飛馬過濠邊秦大鵬引弓射之應弦而倒快甚

二十日賊放礮

賊放紅尼礮自卯時至巳時方止

午刻賊射進登道宋之儒移會總兵鄧玘公文

賊安營於南上莊

申刻賊於南上莊安一營盤已復烏散

附記 謝韶石曰未刻往祭徐肩老酌醴陳詞懷然動存亡之感記曰能得大忠則祀之以死勤事則祀之公城守勞績昭人耳目國家豈忘公哉故誅中及之

二十一日賊放礮

賊三面放礮終日不絕

下塘報

守東門寇二守募得下塘報班軍鄭思策王祥興
予二十金遣之賊立寨如屏兩人聳身飛越寨不
作聲彷彿崑崙奴矣

撤守城諸生巡衙柵

朱郡伯恐久守兵翫夜行無禁乃撤諸生使各巡
衙柵復令學博逐夜督查城中安枕

二十二日賊造雲梯

東門報賊於寨外作雲梯二架慢以牛皮謝撫往

視諭守者謹偵望。○當晚賊四面熱火如列炬

二十三日賊三面打礮

謝韶石曰余在署正支頤凝思忽一鈴子穿窗而入直墜案側其去不能以寸危哉

二十四日賊放礮

賊於東北西北二角各密布紅巨大礮並滅鹵青
州諸礮自辰至戌連擊不已霹靂之聲響答鐵子
中垛立時粉碎除飛出城者所拾之子如升如拳
如蓮實紛紛堆積不止千餘邑令洪公設處布袋
五百條囊土以待向晚謝撫責指揮羅應封千總

朱永年董督修補其不足者以土坯壘砌三鼓報
完。東西各擊死二賊

賊窩舖失火

賊遺火熱其藥燒死數賊

二十五日二難民來歸不納

辰刻有二難民自賊營逃出奔赴南門謝撫令勿
得繫入蓋賊計窮矣惟有行閒一著不妨過慎
賊遣嫗致書於冷書辦

午後有一老嫗自城外過濠南城縋上云是賊遣

來送書與其姪冷書辨言之鑿鑿未幾郡伯審問
云是姬有心疾竟不可問矣

二十六日發兵擊賊

謝撫恐賊以全力西迎大兵每發兵出城牽制賊
勢是日簡各營官兵及班軍門夫願殺賊自効者
共一千五百人統兵將領謝撫楊鎮面加獎勵部
分爲兩一東北一西南撫鎮親持刀督戰於濠外
兵士勇氣百倍直拔賊寨而出衝殺數里許自辰
至午鏖戰不退除礮箭傷賊不計陣獲首級六顆

鐵鐘一口鑪五頭衣甲器械不可勝數自圍城出擊無如今之大捷者我軍輕重傷者亦近百人

附記 而初下謝撫將就枕趙芝庭張北海攜壺盃相向抵掌披襟不覺沾醉

二十七日發兵誘賊

午時賊二百餘騎自西來旗標相聞中擁一驕徑入西關翟內監故啓北門使數百人吶喊誘賊來迎謝撫命南門亦如之賊俱整隊而來兵復撤入

附記 申刻謝撫登東城一峯大鐵子從馬前斜過馬駭驚退

西南有礮聲

薄莫雷電交作暴風微雨昏冥深黑咫尺不辨命
城頭屑木爇火盛以鐵籠用佐懸燈之光礮聲隱
隱自西南來謝撫徐監及張孝功城頭立聽移時
二十八日西南礮聲不絕

已後謝撫登西城竚聽移時礮聲連轟數陣似在
二三十里外竊謂大兵以次前進矣

賊運糧東北去

賊毆驢數百頭運糧東北行中有羸輜一乘

城守兵與賊談錮斃之

賊以所擄浙人於西門外招呼同鄉作率眾歸附
等語城守有南兵黃龍郭一龍者與賊談相勞問
爲同儕所首謝撫謂渠敢揚言豈不懼賊竊聽其
爲姦謀無疑行洪縣令嚴鞫錮斃之○午刻雨

下塘報

遣聽用官劉爾黃呂聯芳下塘報二人去如蛻蟬
然

二十九日萊州府推官屈宜揚入賊講撫

屈陝西蒲城人萬厯

壬子
奉人

賊擁一轎藍旗青蓋自西南來入西關已後自西而東謝撫謂是必賊悉眾西迎慮我出襲故變幻以疑我也後知爲屈司李入賊講撫

賊自火其外寨

焚除編寨之樹枝及葉欲其疎徹以窺我也。酉刻西門礮響

三十日賊驅驢負載東行

梟逆民高雲梯鞠觀生於市

先一日有逆民高雲梯以擄捕大翰跳城從賊楊

鎮覺而追縛之茲復有百總鞠集生飾功冒賞為
眾所詰郡伯拘質之其弟觀生守塚縱兄逸去乃
梟二人於市

石角廟火起

石角廟在城西北五里許

西南礮聲

耿仲明誘殺天津舊將孫應龍

應龍自言與耿仲明兄弟善能令其縛孔有德李

九成來降津撫鄭宗周

山西文水人萬曆丁未進士

信之授以

船六十號兵二千人應龍遣人說仲明仲明偽應

之且爾人首遺應龍曰此有德首也吾已據城
汝亟以舟師來接應應龍舟直抵水城賊放舟出
迎我舟俱入城仲明縛應龍斬之賊得津船水師
益盛

毛荊石曰按視師記此係四
月內事第未詳其為何日耳

